



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 3

US-i nuclear tendangba mapa
tenzükshira Russia-i tapet mera agitsü: Putin

Taruba hopta EAM, S Jaishankar
G7 senden nung adentsü



VOL. XXIII ISSUE NO. 31 (ADOK 31) DIMAPUR ROGONÜ (FRIDAY) YIMPOKSÜI (NOVEMBER) 07, 2025

₹ 5.00

DALT mendenpurtem tasen shim

Dimapur, Nov.06 (TYO) : Dimapur Ao Lanur Telongjem tenzüker 5 buba lokti senden tanü Yangtepnü (Thursday) Senden Riju, Dimapur nung liogo.

Iba lokti senden nung tetushi tejaoker MLA aser Advisor Wb. Moatoshi Longkumer liasü aser “Tanü jenjang aser Tarutsü nükla” onük nung Tir Yimyim yimozülur K.Temjen Jamiri tongti o jembia liasü.

Iba kasa sentong nung MLA aser Advisor Wb.Temjenmenba, Ao Senso Telungjem Dimapur tir Wb.Ningsangwaba Pongen aser DALT nung Shisalen teyur Wb. I.Anungba Sanglir nungertemi tajungshi aser tayongzüka o jembia liasü. Iba sentong nungsa Kr.Imsuyala Aieri ken tajung ka aten.

Iba sentong nung jembidang,

MLA & Advisor Wb. Moatoshi Longkumeri lanurtem dang tanü putu den apet technology aser AI amshia business mapa tapu balala inyaksü aser aluyimba nunga temulung agütsütsü ajungshi.

Kasa sentong nung tongti o jembir, K.Temjen Jamiria lanurtem dang mapa ajak nung indangdanga alitsü, len tatsübalen nungi rongsen aser takok mebushtsü aser Naga nunger kin ajak den kasasa tesentaktep tajung lia, parnok asoshi mapa tajung inyaktetsüsa alitsü ajungshia liasü.

Iba lokti senden ajanga tang nungi DALT len anitsü asoshi mendenpur tasenpurtem rongnung tir Wb. Wb. Bokti Jamir, Tadong tir Wb.Abenjang Imchen, Tongti zülur Wb. Mayang Jamir aser Repsem zülur Wb.Lima L Jamir shimtet.

Vihozhonu Zao tepsetba osang tiazü meporoktsü metetdaksür

Kohima, Yimpoktsü/Nov. 06 (TYO): Brehostibarnü Nagaland Police-i nüburtem dang October 24 nü tepsetba Vihozhonu Zao dak sendakba osang mejangja, tiazü aser meshidak meporokshitsü tekum dangtsü metetdaksüogo.

Social media nung osang meshidak prokshiba tatok malitsü aser iba ama inyakba atema ozüing agi melaba mera agitsü, ta ashi.

Iba ken o dak sendakba nung police temi Mongulbarnü asür indang 'adopted uncle' Samuel Zao puogo aser tang onok ket nung lir, ta Nagaland Police sangdong ajanga ashi.

Asündangyaba mapang temulung melemi alisang-i Old Minister's Hill, Kohima nung parnok aliba kidang la tepsetba nangzükgogo. La tasü mang ya tasüngji kiyonger ngutet.

Tang bushisüng dang tesüdak aliba ken o nung kanga tekum dangtsü lir, saka social media amshirtem, influences aser social media sapang kar nung Vihozhonu Zao tepsetba, temulung melemi alisang nükjidong aser iba mapa tamajung nung dena aliba

nisungtem indang osang tejangja masü aser olulu prokshir, ta police-i ashi.

Item inyaksangshi ya Information Technology Act aser Bharatiya Nyaya Sanhita (BNS) kübok temerenshi agütsütsüsa aibelenba lir.

Osang tejangja masü mesüra dangar tenüing menüksüsa content lemsatepba mesüra yangluba metetra aputsü, okadak ken o benoktsü aser tepuokdak ayutsü, ta Nagaland Police-i ashi.

Bushisüngdang temi temulung melemi alirtem rongnung madenba nisungtem tenüing kuli tejangja makai amshiba mesüra tenüing menüksüsa aser nisung tepsetba 'communal identities' den sendakteptsüba mapa aser yimya khenyongo mamshitsü metetdaksü.

Tejangja masüba osangtem meporokshitsü aser posts tiazü prokshiba osang metetdaksütsü police ajanga ashi.

Arishi küm 22 tan Vihozhonu Zao tepsetba ajanga nüburtem jashitepa ola adoker, candlelight vigils ayongzüker aser tekeraba nung ochi obendang agütsütsü akhanger.

ANCSU-i scholarship atema longkak maittsü ayongzüker

Dimapur, Yimpoktsü/Nov. 06 (TYO): 2024-2025 atema phase tanabuba Post Matric Scholarship ST ya November 12, 2025 nü mesüra aji masü dang lema agütsütsü ta Department of Higher Education, Government of Nagaland nungi osang arua lir. Anungji ANCSU nung affiliate süa aliba colleges ajunga dang longkak maittsü aser Union Assembly Resolution 2017 shidak amshitsü ayongzüker, ta All Nagaland

College Students Union (ANCSU) sangdong ka ajanga ashi.

Department-i mapang shidak nung scholarship magütsüra democratic yimya nung longkak aitba sentong ayongzüksü renema lir, ta sangdong ajanga ashi.

Maneni, pen-down strike mechi mapang süya iba mapa senzüka yutsüra, scholarship lemstüba departments, ketdangsür khuret asütsü, ta ANCSU-isa matetdaksü.

State Cabinet-i IAS list meyipa agir, inyakyim lepa reprangshitsü

Dimapur, Yimpoktsü/Nov. 06 (TYO): Nagaland Cabinet-i 2024 IAS induction list of Non-State Civil Service (Non-SCS) officers atema Union Public Service Commission (UPSC) nem tenüing agüja aliba meyipa agitsü Brehostibarnü telemtetba agiogo aser iba inyakyim ajunga lepa reprangshitsü sangdongogo.

Nagaland Chief Secretary, Sentianger Imchen, IAS-i sangdong ka agütsüba nung, Brehostibarnü Cabinet senden mena Nagaland nungi Indian Administrative Service (IAS) nung Non-SCS officers anioktsü aliba dak sendakba nung mangatettep adoka aliba indang jembia liasü, ta ashi.

IAS nung Non-SCS officers

anioktsü atema vacancy sangdong ya 2020 küm tim ketdangsüri mela agizük, ajisüaka iba mapang Cabinet memorandum mesüra policy telemtetba kecha meliasü, ta ashi.

March 10, 2025 vacancy circular ya tim ketdangsür nungi temelaba magie agütsü.

UPSC ajanga October 10, 2025 nü Nagaland sorkar dang 2024 select list atema panel of eligible officers dak sendakba nung samar aliba documents kar agütsütsü aser osang agütsütsü shiti aruba Cabinet-i tenok-tenoka anga liasü.

Background shidakba aser 'facts and contentions' tasen kar jangjateta, Cabinet-i September 26, 2025 nü UPSC nem agüja

aliba panel of names meyipa agitsü telemtetba agi, ta sangdong ajanga ashi.

Cabinet-isa telemtetba tajung agitettsü mechi IAS nung Non-SCS officers anioktsü atema eligibility criteria dak sendakba nung taoba mapang telemtetba agia aliba ajanga lepa reprangshitsü pangjem.

Iba mapang stakeholders tangatetba asadangtsü aser Department of Personnel and Training aser UPSC nungia shisa agitsü, ta Chief Secretary sangdong ajanga ashi.

Amalitep akatsü ayongzüka Cabinet-i iba ken o nung longkak aita alir ajak dang longkak aitba anentsü ayongzüker, ta sangdong ajangasa ashi.

JCC tim nung nokdaker; longkak aitba anena atatsü ayongzüker: NSF

Dimapur, Yimpoktsü/Nov. 06 (TYO): CANSSEA, FONSESA, NSSA, NIDA aser NF&ASA agi tentetba Joint Coordination Committee (JCC)-i akhangba dak sendakba nung Naga Students' Federation (NSF) ajanga Nagaland Chief Secretary dangi tezüluba ka agüja liasü, kong JCC-i akhangba ya tejangja aser parnoki State indang service system nung ochishia inyaksü asoshi constitution sülen anidaktsü temeden shidak bushiba nung onoka dena lir ta ashi.

Nagaland nung sorkar mapa inyakba aser mapa nung aniokba nung 'meritocracy' ya melenshtsü makokba tamendak dak lir ta tangatetba nung Federation-i teti nokdaka arur.

Ochishia tangatetba shidak nung sorkari inyaksangshiba aser public institutions nung nüburtemi tamang akaba ya state service telungzüik nung sorkar mapa nung nübu

shimokba aser promotion yimya shidak amshiba constitution-i melaba ama inyakba nung amendaka lir, ta NSF-i ashi.

Anungji Indian Administrative Service (IAS) nung aniokba inyakyim nung tim masü inyakba ya tebilemtsü tulu lir. Tim masüba yimya ajanga mapai aitba ketdangsürtem IAS nung anioktsü asameyangba ya nübu tajungtiba shimba tanüla nung aibelenba lir, ta ashi.

Anungji tang teinyakdak IAS induction maparen nung tim masüba mesüra constitution-i memelaba ajak State sorkari jangjateptsüla aser magir ta sangdongtsüla, tajungtiba nung ajemdaker ochi inyakyim nung Nagaland Public Service Commission (NPSC) mesüra established service rules aser constitutional provision agi melaba ama tejangja recruitment boards amala ajanga aitba ketdangsür kisüing shimoktsüla, ta NSF-i ashi.

Department of Personnel & Administrative Reforms (P&AR) kübok ozüing agi mela aser ochishia nübu shimba inyakyim ka tenzüksüla, kong eligibility criteria, audit mechanisms tejangja alitsüla aser tarutsü nung induction mesüra promotion inyakyim ajak ochishia shidak yimya nung inyaksü asoshi tetemsü ketdangsür nem achayangdaksütsüla.

Kasa mapang NSF-i JCC dang nüburtemi aginüba ama tang longkak aita aliba ya khen asoshi agiena atatsü mepishir, kechiaser mapang talangka mapa junga meinyakba ajanga tongtipang maparen aser service agütsüba nung timtem jenti ajurur ta ashi.

Public institution nung ochi agi tetemsü nübu shimba yimya wazüka ayutsü temulungtetba nung NSF bendanga agütsür nokdaka lir, ta parnokisa shiti nung ashi.

Territorial Army Recruitment Rally atema mapa lemsa



Dimapur, Yimooktsü/Nov. 06 (TYO): Territorial Army Recruitment Rally dak sendakba nung Commanding Officer, 113 Infantry Battalion (TA) Rajput, Rangapahar military station ajanga sendaktepa aliba department den shisadokden senden ka November 6, 2025 nü Deputy Commissioner, Dimapur indang Conference Hall nung mena liasü.

Iba senden nungya November 15, 2025 nungi December 1, 2025 tashi Territorial Army Recruitment Rally atema tejangja jembishinüa liasü. Iba recruitment rally tajungtiba nung takok ngua agitettsü mechi

logistics & vene; security aser Law & order; medical facilities; Documentation and verification; Transport & Sanitation indang tejangja jembitepa liasü.

Iba senden nung Commissioner of Police, Dimapur; Commanding Officer, 113 Infantry Battalion (TA) Rajput; Chief Executive Officer, Dimapur Municipal Council; Executive Officer, East Dimapur Town Council; Executive Engineer, (P) Dimapur; Executive Engineer, (R& B) Dimapur; Executive Engineer, PHE Dimapur; Chief Medical Officer, Dimapur; District Education Officer, Dimapur;

District Transport Officer, Dimapur; District Public Relation Officer, Dimapur nem mapa balala lemsükja liasü.

Iba rally ya Nagaland nungbo mezüingbuba alitsü, kong North Eastern States 10 nungi candidate 15,000 shi shilem agitsü.

Recruitment nungya arishi küm 18 nung 42 tsüngta aser class 8-10 pass sür alirtem nungi tema shilem agitettsü. District ajunga nung anogo lemsar rally ya agitsü. Mezüing batch atema rally ya anepdang 5:30 ako nung tenzüksü aser anepdang 8:30 nungi 9:00 tashi alitsü, koba TCP Gate nung High Mountain School ground tashi aotsü.

BVP SEIL delegate temi Tovihoto ajuru

Dimapur, Yimpoksüi/ November 6 (TYO): Akhil Bharatiya Vidyarthi Parishad (ABVP) SEIL (Students' Experience in Inter-State Living) delegate temi November 6 nü MLA & Advisor, Tribal Affairs and Election Department, Government of Nagaland H. Tovihoto Ayemi den par kidang ajurutepogo.

Iba team nung state aser sobaliba balala nungi nüburtem densema liasü aser parnoki iba tour indang nükjidong Tovihoto nem metetdaksü, koba sobaliba angazüktepba ajungketsü aser India ajunga nung sobaliba balala benshiba nüburtem tali tajungba

sendakteptsütsü asoshi lir. Iba inyakyim tajung benokba atema MLA-i parnok nem tenüngsang agütsü aser team züngsemtem dang sobaliba ambassador kaka ama inyaksangshitsü aser linük nung sobaliba balala indang tangazükba agütsütsü ajungshia liasü. "India ya linük tulu ka aser idaki sobaliba aser tamangba yimsü aika lir, saka nisung aikati linük ka kübok külemi liaka kati ka indang memetet," ta pai ashi. Linük longjemdaksütsü atema lanurtem shilem indang jembiba mapang MLA-i, "linük nung nütsüngyongsük shilem 60 dak tema arishi küm 35 tekübok lir asünung kati ka nem tangazükba agütsütsü, lokti

balala tsüngda telongjem adokdaksütsü aser sobaliba, shilu balala aser tamangba yimsü balala dak amangertem yimjung nung lidaksütsü atema tangazükba agütsütsüji lanurtem mapa aser khuret lir. Ajita asünung dang India-i linük ya alima nung democracy tulutiba ka kong tazüzüktepba aser kati ka agizüktetba tanüla lir ta sayutettsü," ta ashi. Kasa mapang nung delegate tem yagi MLA & Advisor dang tajungshi o tajung asoshi pelaba lemsatepba den state o state tangatettep atema aser sobaliba ajanga telongjem adokdaksütsü asoshi maneni inyaksü ta tenangzükba agüja liasü.

Wangpang-i Mon nung Eye camp ka moatsü

Dimapur, Yimpoksüi/ November 6 (TYO): Advisor for Social Welfare, Wangpang Konyak-i, November 6 nü District Hospital, Mon nung tientet rogotem atema Eye camp ka ayongzüka katsüba mapang tongti tejaoker ama shilem agiogo.

Iba camp ya Department of Social Welfare aser Mercy Eye Centre Dimapur na longjemer ayongzük aser District Hospital, Mon-i nongita yaria liasü.

Sentong nung o jembiba mapang Konyak-i, tientet rogotem tenük anepalutsüba sentong nung pa-a densemba atema kanga pelaba lemsatep. Iba ajanga tientet rogotema sentoka metoktsüi lir ta sayur. Social Welfare department-i, lokti nung tangar memenepertem nem teyari balala agüja parnok ajungketdar, kong tientet rogotema densema lir, ta pai shisem

Paisa, tientet rogotem

atema Old Age Pension, Elderly Helpline aser Charity Care amala sorkar scheme balala indang metetdaksüba den district ajak nung Old Age Home kaka amenoktsü sorkar sentong aliba metetdakja liasü.

Maneni pai tintet rogotem dang parnok taneptsü takaratiba nung angutsü atema Doctor tetuyuba sülen tashi anga anidaksü mepeshia metetdaksü. Advisor-isa, Mercy Eye Centre Dimapur, Dr. Chingkup Konyak aser par team aser District Hospital, Mon aser Deputy Commissioner Mon nunger nem tenüngsang agütsü.

Sentong nung o tatsüka jembiba mapang Deputy Commissioner Mon, Wennyei Konyak-i, iba camp ayongzüka katsüba atema Advisor Social Welfare Department, Mercy Eye Centre Dimapur aser District Hospital, Mon nunger dang kanga pelaba lemsatep.

DC-i, asen lokti nung nüburtem tenük agi mongui timtemba ya facility aser iba timtem indang jangja maliba ajanga lir ta ashi. Anungji pai sentepa aliba lokti dang anema jangradema alitsü atema mapang shitak nung temang tendangtsü ajungshia liasü.

Maneni sentong nung Dr. Ngopole Keviechu, DTO Mon-i, tenük anepalutsü aser mozü shitak agitsü koda tongtibang iba indang lemsatep aser Dr. Chingkup, Mercy Eye Centre, Dimapur-i iba camp ayongzüka agiba nükjidong lemsatepa liasü.

Sentong ya Khonbeni Jami, CDPO Phomching lenisüba nung agi, Yanlem, District Welfare Officer, Mon-i lokti pela agizükba o jembia, Chaplain District Hospital, Mon David Konyak-i Tsüngrem temaotsü meshizüka sarasadem aser Amilo Yanthan, CDPO Tizit-i tepela o jembia liasü.

DHD nung meshimetsür ka tasü mang yua lir

Dimapur, Yimpoksüi/ November 6 (TYO): November 4 nü 1:50 pm nung District Hospital Dimapur nungi Doctor temi arishi küm 18 tain meshimetsür ka tenüng agi Miss. Raksana kinunger shinga mali mozükidangi anir aruba osang agüja liasü.

Iba dak sendakba nung Sakhi One Stop Centre nem osang agütsü, saka aonung 8:20 ako shi nung DHD-isa Raksana ya mozükidang asüba osang agüja liasü.

Iba osang dak ajemdaker duty party mozükidangi ao aser tasü mang dak sendakba nung ken o asüngdangya liasü.

Temzüng ozüng kübok tinyaktsü maparen ajak tembangba inyakba sülen tasü mang ya PM examination aser identification atema District Hospital Morgue-i bener oa liasü.

Asüla yagi kurta tanak den silver print ka semer liasü. La ya naro aketba ali sentsü sü ka agi meyibanger liasü aser la tekong nung camouflage yangku ka azüker liasü.

Asülaer kinunger, adianu aser medemertem dang Officer-in-Charge, Women Police Station, Dimapur. (Mobile No. 7085055027) den tongteprateptsü mepeshia metetdaksüogo.

CM Dr. Rio-i asü khu lemsatep

Dimapur, Yimpoksüi/ November 6 (TYO): Nagaland Chief Minister Dr. Neiphiu Rio-i sangdong ka ajanga, Minister P. Paiwang Konyak tetsü Mrs. Among Konyak November 6 nü asüba osang angazüka asü khu lemsatepogo.

Mrs. Among ya bendanga agütsüba kinungtsü, tetsü aser otsüla ka liasü, shiba Tsüngrem dak tera yangloka liasü. Lai Tsüngrem dak tamang akaba ya lar kibong leniba tesangwa ka liasü. Lai nüngdaka alirtem teti yaria aruogo aser temeim taochi sayua la anasa alir takü mtem dak kongshiogo.

Mapang tatsüka tsüngda tsürapur anaprongla taküm samaba ya tebang agi ashitsü makokba tejashi lir. Tetsü ka asüba ajanga tawa toktsüba süngdaksütsü tasak aser la maliba ya lar kidang kanga metettsü, ta CM-isa shisem.

Mangyim jashi tia nung aliba mapang ni aser ozü kibongi asür kinungertem den asü khu lemsatepogo. Tulusang tsüngremi nenok nem iba tejashi koktettsü atema tashi aser tesunep agütsütsü sarasademja atar. Asür tanüla teti tatem makadak anisüngzükdakjang, ta kasa sangdong ajanga metetdaksü.

Association of Kohima Municipal Wards Council-i tenüngsang agütsü

Dimapur, Yimpoksüi/ November 6 (TYO): Association of Kohima Municipal Wards Council (AKMWC)-i sangdong ka ajanga, October 25 nü jala asür Vihozhonu Zao tepsetba ken o takaratiba nung bushisüngdanga oa aibelena alirtem putetba atema Kohima Police nem tenüngsang agütsüogo.

Parnokisa, Kohima Police/ SIT dang ken o kanga junga bushisüngdangtsü aser aibela alirtem inyakyim tejangja metetdaksütsü mepeshiba den, aibelena alirtem nem temzüng ozüng dak ajemdaker temerenshi tesashi agütsütsü takhangba agütsüogo.

Kasa mapang nung AKMWC-isa, Naga nungertemi tangar kin adopt asüba ken o ya kanga süoki ia

bilemba lemsatepogo, aser lisopurtem dang Naga nunger masü tanga kin nungi tanur adopt asüba mapang kanga junga asadangtsü ayongzüko, kechiyong iba ken o ya ajak tenük lapokba mapang ka ta shia, tantsür kati per ka mesüba sülen la nem tenüngsang agütsütsü melenla la dak mechiba indang otsü den iba tatalokba ya medemdanga jembia liasü.

Maneni AKMWC-isa, ken o balala takaratiba nung bushisüngdanga mapang shitak nung ochi obendang agütsütsü atema sorkar dang Kohima nung takaratiba nung Forensic Science Laboratory (FSL) ka amenoktsü takhangba agütsüogo, ta AKMWC tir Thejao Sekhose-i sangdong ka ajanga metetdaksü.

Mokokchung nung Unity Walk sentong agi

Dimapur, Yimpoksüi/ November 6 (TYO): Sardar Vallabhbhai Patel sor küm 150 ajungba nüngdem nung Mokokchung nunga November 6 nü Town Hall nungi Imkongmeren Sports Complex tashi Unity Walk/ Padyatra sentong ka ayongzüka agiogo.

Iba sentong ya linük telongjem, integrity aser security wazüka ayutsü atema asenok tali bendanga agütsüshitsü nükjidong nung ayongzüka agiogo.

Sentong nung District Administration Mokokchung, Sr. Superintendent of Police Mokokchung, office tekolak ajak, 12th Assam Rifles, CRPF, Home Guards & Civil Defence, Ex-Servicemen Association, Mokokchung Municipal Council Chairman 7 Councillor ajak, Ao Senden, Watsu Mungdang, Bharat Scout & Guides, NCC, National Service Scheme, Mokokchung Town GB's Association aser Mokokchung ward union-i shilem agia liasü.

GOVERNMENT OF NAGALAND
OFFICE OF THE DIRECTOR GENERAL OF POLICE
NAGALAND ::: KOHIMA

NO. PHQ (B-I) 1/Recruitment/Constables/2023/2284
Kohima Dated, the 6th November 2025.

ADDENDUM

This is in continuation of the advertisement issued by the Office of the Director General of Police, Nagaland vide **No.PHQ(B-1)1/Recruitment/Constables/2023/ Dated 30/09/2025**, wherein Dimapur, Chümoukedima and Niuland districts together have been allotted 144 posts of Constable (GD) for recruitment and placed under “Open Competition Category” for all the indigenous Naga Tribes of Nagaland.

The above matter has been further re-considered by the Government and it has been now decided, as conveyed vide *Home Department letter NO.POL/ESTT/ RECRUITMENT/1/202(PT-VII)/ Dated: Kohima the 3rd Nov. 2025*, to allocate the 144 posts for Dimapur, Chümoukedima and Niuland Districts amongst the indigenous Naga Tribes of Nagaland as per the Tribal Ratio basing on the available 2011 Census Data for the indigenous Naga Tribes of Nagaland in the erstwhile Dimapur district.

The allocation of posts for each of the Indigenous Naga Tribes of Nagaland for Dimapur, Chümoukedima and Niuland Districts combined, and the rest of the districts will be uploaded for information of all concerned at **Nagaland Police Recruitment Portal** and **Department’s website <https://police.nagaland.gov.in>** respectively. Further, in continuation of Para at Serial No. 6 (G) (ii) of the Advertisement dated 30/09/2025, break-up of the total posts for Male and Female will also be indicated in the same Table/Chart as stated above.

The applicants applying for recruitment for the posts in Dimapur, Chümoukedima and Niuland Districts should beresidents of these districts and should have all their supporting documents like Indigenous Inhabitant Certificate, Schedule Tribe Certificate, etc, issued by the concerned District Authorities, not below the rank of the Additional Deputy Commissioner of Dimapur/Chümoukedima/ Niuland, as the case may be.

In view of the above modifications being brought in, an option for changing the applied district in the **Nagaland Police Recruitment Portal** is being incorporated for candidates who have earlier applied for Dimapur/Chümoukedima/Niuland Districts. They can now re-apply in case it is required in some other districts/respective native district from **8th November 2025**. The candidate may log in during the allotted period using his/her already registered mobile number for making the required changes and a revised Admit Card will be generated.

Further, the closing date for filing the Online Application Forms is extended by **15 (fifteen) days** i.e. w.e.f. **08-11-2025 to 22-11-2025**.

Besides the above stated modifications other contents/guidelines issued earlier vide Advertisement dated: 30/09/2025 will remain the same.

Sd/-
(VIDELALIE ZASHUMO) IPS
Inspector General of Police (Administration) &
Chairman,
Departmental Recruitment Board.

Bihar election mezüngbuba shilem nung voters 60%-i vote agütsü



November 06, 2025 nü Patna district kübok Bakhtiyarpur nung aliba polling station ka nung Bihar Chief Minister, Nitish Kumar aser tangartemi vote agütsüba temaitsü sayudang tangokba noksa nung angur.

New Delhi, November 06 (Agencies): Brihostibarnü Bihar nung assembly election mezüngbuba shilem agiogo; anepdang 7:00 ako nungi tenzüka vote agütsü aser nikongdang 5:00 ako tashi nung voters shilem 60.13-i vote agütsü.

2020 küm Bihar election mezüngbuba shilem den medemdangra tanü vote agütsüba shilemji 4.45 agi teimba lir, ta election kettangsertemi metetdaksü.

Tang voters teimbai vote agütsüba ya state nung electoral roll yanglushia special intensive revision (SIR) agiba agi lir, ta parnokisa metetdaksü.

Bihar election mezüngbuba shilem nung menden 121 atema election agiogo aser taruba hopta (November 11) tanüngba menden 122 atema election agütsü.

Election mezüngbuba shilem nung candidates rongnung minister 16, film actors, kentenertem aser nisung tepsetba ken o nung tai tonglokja alir kata densema liasü.

Candidates rongnung opposition nungi Chief Minister

candidate Tejashwi Yadav, deputy CM ana aser cabinet minister 13 densema liasü.

Mezüngbuba shilem nung vote agütsütsü temsüa alir voters crore 3.75 liasü aser menden 121 atema tokteper candidates ajak senteper 1,314 liasü.

Election mezüngbuba shilem nung tokteper rongnung taoba mapang MLA Anant Singh densema liasü. Mokama nung party ana tsünga rara adokdang Jan Suraaj pusemer, Dularchand Yadav tepsetba ken o nung Anant Singh nem tai tongloktsüba sülen November 1 nü police-i pa pua liasü. Anant Singh ya taküm August 6 nü Beur jail nungi chioka liasü aser November 1 nü pa apuba sülen kasa jail nungsa puok.

Bodhbarnü Bihar nung chief electoral officer, Vinod Singh Gunjiyal-i, election timi agütsü atema nüngdakba mera ajak agiogo, ta metetdakja liasü.

Brihostibarnü vote agütsütsü temsüa alir voters crore 3.7 nungjagi voters crore 10.7 bo tang tasenpurtem lir. Iba nungji arrshi küm 18-19 purtem lakh 7.3 densema lir.

2020 küm Bihar Legislative

Assembly election shilem asem lemsar October-November nung agia liasü aser iba election nungji JD(U)-i aniba National Democratic Alliance-i menden 125 nung takok angu. Ano Congress aser RJD nati aliba opposition Mahagathbandhan teloktepi menden 110 nung takok ngua liasü. Tanga teloktep tila aser party temi menden 7 nung takok angu aser independent candidates bo kati dang takok ngua liasü.

Taruba hopta EAM, S Jaishankar G7 senden nung adentsü

New Delhi, Yimpoksüi/ November 06 (Agencies): Taruba hopta External affairs minister (EAM), S Jaishankar Canada-i aotsü aser G7 foreign minister tem senden nung adentsü.

G7 Foreign minister tem senden ya November 11-12 anogotem nung Niagara Region, Ontario nung ayongzüka akatsü.

Küm ishika tejaklen India aser Canada na tsünga tesendaktep raksaba sülen tawa tesendaktep tera tajungba kümogo. G7 senden aliba mapang nung Jaishankar-i Canada Foreign Minister, Anita Anand den jurila senden amentsü imlar.

Tan ita tatembanglen South Africa nung G20 senden aliba mapang nung Ato kilonser Narendra Modi aser Canada Ato kilonser Mark Carney nata ajurutsü imlar.

Taküm June ita nung Canada nung G7 senden aliba mapang nunga Ato kilonser Modi aser Canada Ato kilonser Carney na ajurutepa liasü, aser iba mapang nungji linük ana tsünga tesendaktep



yanglushitsü atema jembi.

November 12 nü Jaishankar-i Anand den jurila senden amentsü. Taoba ita Anand-i India semdanga liasü. Lai India semdangba mapang nung India aser Canada na tsünga shishilembaba, technology, energy aser AI densema tongtibang sector aika nung amalitepa inyaksü atema jembishiniüogo.

Sangküm India nung AI senden ayongzüka akatsü aser iba senden nungji adentsü atema India-i Canada Ato kilonser Carney jaokogo.

AXIS BANK
A.C.Market, 4th Floor, 1, Shakespeare Sarani, Kolkata- 700071

Hon E-Auction asütsü atema sangdong

Talisa sen apurtem, aser public dang ya sangdonger, tsünglanglen aliba accounts indang hon agi yangluba osettem Axis Bank-i tsünglanglen shia aliba Branch nung public auction asütsü.

Tsünglanglen shia aliba sen apurtemi security atema Bank nem gold ornaments ("Gold Loan Facility") agüja Axis Bank Limited dang nungi credit facility agia liasü. Sen apurtem/Guarantors nem demand notice agüja sen apurtem/Guarantors dang Gold loan facility agiba sentsü agüjang ta metetdakja liasü. Ajsüaka sen apurtem/Guarantors-i sentsühi magütsüet nungji bank-i gold ornaments ji e-auction asütsüsa akümer, talisa schedule of property nung aliba auction asütsü. **17-11-2025** (anogo nung) nikongdang **12.30** ako nungi nikongdang **3.30** ako tashi (e-auction mapang) "Kong aliar yamaji", "Kong koma alir", "Yangji aliba ajak" aser "No Recourse Basis" nung ayoktsü.

Sen apurtem aser sentsü osang tejangja.

Branch Name	Customer Name	Loan A/c No.	Amount Outstanding	Date of Demand Notice	Gross Weight Grams	Net weight grams.
LHOMITHI BAZAR NL	PAWAN KUMAR JAIN	XXXXXXXXXX2093	770791.00	27-Sep-25	165.000	144.000

Jela osang memetdaksü account agütsü/auction anogo melenshitsü atema Axis Bank Ltd. dak tashi lir. Auction ji online <https://gold.sami.in> (website of online vendor) ajanga nikongdang 12.30 ako nungi nikongdang 3.30 ako tashi agütsü (mapang). Telatetbatem osang tejangja atema agüja aliba website nung repringang <https://gold.sami.in> (website of online vendor)

Date: 07.11.2025
Place: Kolkata

Authorized Officer
Axis Bank Ltd

DEBT'S RECOVERY TRIBUNAL GUWAHATI
Suwarna Bhawan, House No, 12, New Town Path, Near Hanuman Mandir, G.S. Road, Ulubari, Guwahati
781007 (Assam)

Case No.: OA/457/2025

Form No.3
[See Regulation - 13 (I) (a)]

Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Proceture) Rules, 1993.

UCO BANK
VS
M/S MOON LIGHT ELECTRONICS & Ors

To,

(1) **M/S MOON LIGHT ELECTRONICS**
PROP MR TAJUL ISLAM CHOUDHURY SON OF MALIK AHMED CHOUDHURY H/NO-735 NEW MARKET NAGALAND DIMAPUR-797112

(2) **MR TAJUL ISLAM CHOUDHURY**
SON OF MALIK AHMED CHOUDHURY HOUSE NO 32 NST COLONY DIMAPUR NAGALAND 797112

(3) **MRS ABIDA KHANAM CHOUDHURY**
WIFE OF MR. TAJUL ISLAM CHOUDHURY HOUSE NO 32 NST COLONY DIMAPUR NAGALAND 797112

SUMMONS

WHEREAS, OA/457/2025 was listed before Hon'ble Presiding Officer/Registrar on 24/10/2025.

WHEREAS this Hon'ble Tribunal is pleased to issue summon/notice on the said Application under section 19(4) of the Act, (OA) filed against you for recovery of debts of Rs. 2218106.96/- (application along with copies of documents etc. annexed).

In accordance with sub-section (4) of section 19 of the act, you, the defendants are directed asunder:-

(I) to show cause within thirty days of the service of summons/ Publication there of as to why relief prayed for should not be granted;

(ii) to disclose particulars of properties or assets other than properties and assets specified by the applicant under serial number 3A of the original application;

(iii) you are restrained from dealing with or disposing of secured assets or such other assets and properties disclosed under number 3A of the original application, pending hearing and disposal of the application for attachment of properties;

(iv) you shall not transfer by way of sale, lease or otherwise, except in the ordinary course of his bussiness any of the assets over which security interest is created and/or other assets and properties specified ot disclosed under serial number 3A of the original application without the prior approval of the Tribunal;

(v) you shall be liable to account for the sale proceeds realised by sale of secured assets or other assets and properties in the ordinary course of bussiness and deposit such sale proceeds in the account maintained with the bank or financial institutions holding security interest over such assets.

You are also directed to file the written statement with a copy thereof furnished to the applicant and to appear before Registrar on 01/12/2025 at 10:30 A.M. failing which the application shall be heard and decided in your absence.

Given under my hand and the seal of this Tribunal on this date: 29/10/2025.

Note : Strike out whichever is not applicable.

Exh. No.: 5644

Signature of the Officer Authorised to issue summons.
Registrar, Debt Recovery Tribunal, GUWAHATI



Anantnag, November 06, 2025: Sardar Vallabhbhai Patel sor küm 150 ajungba nüngtem nung Brihostibarnü Jammu & Kashmir kübok Anantnag nung school tanurtemi 'Unity March' nung shilem agidang tangokba noksa nung angur.



TIR YIMYIM YIMOBILEM (EDITRIAL)

DIMAPUR FRIDAY, NOVEMBER (YIMPOKSÜI) 07, 2025

Supangsangi tetsü kolak lepzük ama !

Shin o nung ashi ama, tanüa Nagaland nung tangar asoshibo "azü ya tzü dang nungi temeimba," saka asenok Aotsür Aor asoshibo azü dang nungi tzüang temeimba amai azü agi tangsemba tetezü kecha maka küma omadagi. Iba jagi asen Ao kin nungbo asen kinungertem rongnunga tedi tenu aser tanük-teku dena melongjemteter. Iba jagi tedia, tenuta aser tanüka aser tekoa pi sülenang jangratema anidakba mapangji asenok tanü jenjang ya lir. Ibai asen tetsü-tebou otsü nung tangari ashiba nung amanger, Supangsangi tetsü kolak lepzüka ayu amai lir. Ni asoshi yimten nung jenjang ka ngutetra, business nung teyari ka danga ngura, küdi kenu aser kanük kükoji pi tsüng agi ajemshitsüsa maksü tiai aiyonga kecha masü ta tangar tsüngdang nümadangdanga senzürtemji, tangar Naga nunger masü asenok Aotsür Aortem kümogo. Iba tia nungji tanü asenok lir ! Tangaribo tanü tashi asen dak mulung alemer aser asen dak nungi ano tajung tuluka imlar saka asenok o asenok na tangar tenzüksü asoshi injang bomb, süng long aser takaba rongsen ajak amshia rakteper. Tanü asenok iba tia nungji lir ! Anungji, joko, Naga nunger yimten aser loktiliba nung asenoka shitakba Aotsür Aor mesüka akümtsü asoshi mapa ajak nung khen tasen küma tenzüksü kanga nüngdaka kümogo. Aji oda, timatemyonga, takoksa anguyonga aser tamakok anguyonga asenok Ao kinbo o nung aser mapa nung indangindanga aliba ochishir kin aser tangar asoshi tajung inyaksüba temeim aketba kin asütsü ano khen merangteptsüla. Atangji, asen dang nungibo pi taoba ta bilemba temeim shisatsü asen tsüraburtem dak liasü, iba senmangji asenoki meyipa bener arua amangshitsüla. Idak nung jagi asenok asüng asoshi tashi tasen angutsü. Asenokbo takar aser tulur akümtsü asoshi len tatsüba, short cut, mebushitsüla saka len alangyonga shitakbalen nungi akatsü aser ulutsü merangtsüla. Ajiang shitakba asen senmang akümtsü. Ibajibo mesamatsü. China nunger shin o ka nung ashiba agi, asenoki mashilen nungi bendenba ali rongsen yabo talangba agia putu asem, 3rd generation tashiag amangteter aser samadoker. Tetezü aseni len tatsüba nungi bendena yutsüba ali rongsenbo asen chir tashi agirbo asen semchir mapangbo samadoktsü. Ibaji asen lima nunga shitak atalokba asenoki angur. Ano asenok dak tangatetba ka alitsü nüngdakbaji, asen Ao kinbo Naga nunger kin ajak den kasasa tesentaktep "Equi-Closeness" tangatetba nung alitsüla. Tetezü tangar jilu ajizüka, Naga nunger kintem rongnung kar den balaka tesendaktep meyanglui ajak den kasasa jungtepa alinung dang ajaki asen dak temulung lemteta jungteptsü aser tanü ama timtem mapang Naga nunger ajak asoshi yimjung mapa inyaker asütsü. Akhi mapang, asen tsüraburtemi Naga nunger asoshi len tasen, pioneering path, lapoka azüng zülü aser Yisu temeim yimsü tajung sayu. Aji oda, asenok tazüng-temetet nunga mezünpur asüba agi government mapa nunga asenok teimba aküm. Joko, tanübo government mapa nunga tangar Naga kintemi asenok ajateta odagi, aji aseni len sapoka yutsüba nung asenok takok angur asütsü, kechiyong tangar Naga kintem tashitemetet küma, ano government mapa nunga jenjang tajung ngutetbaji asen tsüraburtemi prokba metsü nungi süngjang atanger ta asenoki angatetdi. Iba tensa yagi, ano, asenokbo tanü putu den apet len tasen pipoka Naga nunger lensen kati anir aotsü bilema inyaksü ajungshir. Item lensen mapatem rongnungji Technology aser Artificial Intelligence amshia inyakba business mapatem angazüka asenoki tenzüksüla. Aji oda, technology tapu balala amshia alu ayimtsü aser US aser Israel nunger ama chiyongtsü züsentetba aser yangluba, Food Production and Food Processing mapatem asenoki inyaksüla, kechiyong US aser Israel nunger amaji chiyongtsü peria aka nung dang raraba osettema yanglutetstü, ita petinutemi atutsüba mapatemjia inyaktetstü. Kong aser kechi mapa inyakdir inyakaka, tebok tama asüngtsüla. Iba atemaji tangar dak nendak malitsüla. Aji oda, asenoki züsentetba agi asenok tebok sünger asenok putepa litetra, asenoki linüba jenjang nung asenoki litetstü.

OLEMSABANG

KITA CHIR

~ S. Aosüngküm Ozüküm

(Iba Yimdangjem otsü ya Tir Yimyim aser Bookipedia nati ayongba toktep nung Tanabuba takok jenjang anguba liasü.)

(Yashi adok nungi...)

Iba anogo nung kenüdanga pelaa melidangi temulung zürepaa alila Yimtinai ashi, "Teküpbok nungi temabajaenjangi ajungkettsü meimchir shinga daka tashi melika; "Ano nisungi tamajung bilema jembiaka tasüngtet jala jabaso shinga tia tamajung jagi memeneptsü" Saka shiri jembir par chirnur dak tamajungji ataloker ta mapang talangka nungi shisadanga aruba olen ka alima rangpen asoshi tansütsüsa jembi. Aser lai ashi, ano ya tatembang masü, kechiyong alima nung nisung taküm ka ali tashi, "Alangli, saakli, tamakok nguli ano takok nguli" ta melentepa aotsü ya tetenzüker dang ta yimdangjem olen tajung ka jembisem. Kodang "Kita Chir" Yimkümtii yimsüsüba menden nung amentsüsa takok tulu angu; Idangji tebu aser tebu tebuttsü aser lar adianutem ajunga jembishinü aser yimyatsüya balaka melenadok. Ano Yimkümti tetsü tena timtem mapang nung yaritsü melena mesenmetui mezügmeshiaka tangbo yimer, kidangkimgang ajaki pelaseta dang jembir aser shingaia la dang "Kita Chir" taa majar, saka ajaki tetsü tena den o tajung dang jembir aser akhümtsübu agüja tushir. Kechiyong nisungi aginüaka, maginüaka meranga bushir atema takok korangji yuja kar asünungji; jala "Kr.Yimkümti" takok anguba nüngtem nung tenügsang agütsüba sentong ka agitsü renema lir. Sentong lenniri pelaba olen kar jembiba sülen kinunger nem mapang lapoktsüdang, Yimtina tebu shiba "Yimkümti" tebou lir pa tama nokdaka jembi, saka pa nüktzü agi ananger shilem junga magitet, kechiaser tarutsü nung kechi ataloktsüar meshisadangi amang nung pei jala dang temeim mesayui aritokba bilemteta ajep asütsüa akok. Iba sülen adianu kar jembiyonga or külen Kr. "Yimkümti" tebu shibai laji par jala ka ama agizüka mapang shia anepalu pabo kecha terata melii tepela o den liyonga aotsü olen tajung aika jembir amen. Iba sülen takar jala agi lajar akümla, Yimtina nokdaka jembitsü tenzü, oda kechi nü k agi ajia melitet, kechiyong la tejak nung sentsü mait liasü. Lai ashi, "Nisung agi süng aser lung makümer mesüra shirurua küma maor" saka nisungbo nisungsa alir, anungji tanü kü jala künata akümlir rongnung densema lia, lai takok anguba agi iba sentong agir dangashi küna külemi mejangba mesaak asübo kibur maliba shiruru ka asüba den kasa ali tur remtsünüra melila ta lai taoba nung atalokbatem bilemteta nüktzü aneta jembidang, jala Yimkümtii tetsü dak azülöker tena külemi asüktema ajeptsü tenzü, idangji lokti tesenteper shinga nüktzü maidoker maliasü. Joko tang tatemsa Kr. Yimkümti nem mapang lapoktsü aser lai ashi, "Shingaia mangur, saka iba takok marok telung nung kütsü nüktzü sünga lir",ano iba den otsüla asataor shiba ni anasa mena lir la ya ozü sosem masü, saka kütsü küna den kishi nentepa alir,lai ni numerem nungi tanü tashi la kapuma nung ajung aser kütsü den mangli sangwali aser tia ajak nung yaritepa aruba temeim agi sünga aliba nisung, anungji nenaprongla khen nokdakang ta mepishiba ama tena külemi nokdaka alidang, la takok angunü sorkari agütsüba kuli kakat aser senpetlepji tena kapu nung amokja ashi, "Iba takok marok aser senpet ya nena ajanga ta tenügsang agütsü aser lai ashi, otsüla den kü temeim teti dena alitsü ta tepela o jembir amen. Iba sülen kinunger kar atatepa lir külen tesüiba indang süoka jembidang rongsen dak mulung lemer alisang shibai pei jala anak auyi agia memeyong amang nung aritok pa mulung raksaba aser tatok meshiba o angashia Yimtinai ashi, "Oba na ajep anenang" ta ser lai abena aliba sülak jagi tebu nüktzüji aidoktsü aser ashi, "Tamajung anogotem to talangi jena ogo aser ammangi asenok toktsür ogo, "Joko asenok lensen ka nung jajatsü ayaokogo, anungji tamajung anogotem tanaben shilua meshilangtsü" Ano laisa ashi, atangji oba, küm metsürtenet sülen nai ni ne jala ta chichia agizüker süra nia ne dang tatok meshir aser ne nema tatok agütsür ta kati ka dak azülöker ajepba manenteti iba sentong tembang. Iba sülen anogo ana anisüngzüka mungzüker külen "Kr.Yimkümti" aser tetsüna sorkari agütsüba Gari nung khu ajak enoka bener la alidaki apuso. Idangji Watsü Yimtinai la mulung sadoka pelaseta ashi, "Tese mpatsü longpensep nungi shinü temesüng rütet ama; Teyangluri ammang agi sangwa melentsüogo" Ano maneni lai "Kü Soyim Azükarujang"ta ashiba sülen gari tejaklen tua mener menürema teka ayiploksü aser temenungratsüka lar jala den külemi tasoyimkong toktsür apusoa ao.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Khristan telok kati November 29 nü lokti senden ka ayongzüker



November 04, 2025 nü New Delhi nung Khristan temeden atema inyaktertem telok kati osangbenertem senden ayongzüka jembidang tangokba noksa nung angur. India tesem balala nung Khristantem anema inyakba anema November 29 nü National Convention ka ayongzüka akatsü.

New Delhi, Yimpoksüi/November 06, 2025 (Agencies): Bodhbarnü (November 5) New Delhi nung aliba Press Club of India nung Khristan telok kati osangbenertem senden ka ayongzüka jembidang, November 29 nü National Christian Convention ka ayongzüksü, ta metetdaksü.

Tesüiba küm 10 tsüingda India nung Khristantem anema inyakba shilem 500 agi teimba kümogo; tesüiba küm ter tsüingda India nung Khristantem anema inyakba tatalokba 4,959 liasü, ta parnoki metetdaksü.

United Christian Forum (UCF)-i ashiba agi, 2014 küm India nung Khristantem anema inyakba tatalokba 139 dang liasü saka 2024 küm nungbo Khristantem anema inyakba tatalokba 834 tashi liasü; iba tetezü küm shia India nung Khristantem anema inyakba tatalokba 69.5 agi teimba akümer.

2016 küm nungi 2020 küm tsüingda India nung Khristan 21 tepseta liasü aser parnok rongnung Rajasthan nung pastor ka electric current agi puseta südaksüba densema lir, ta parnoki sangdong ka ajanga metetdaksü.

2025 küm nunga January ita nungi tenzüka September ita tashi nung India tesem balala nung Khristantem anema inyakba tatalokba 579 liasü saka item tatalokba dak sendakba FIR 39 dang benoka lir.

2025 küm Khristantem anema inyakba tatalokba rongnung amokmerenba tatalokba 71, tekülem sentong agitsü memelaba tatalokba 51, tashiyim amshia azükba tatalokba 9 aser kiojen raksatsüba tatalokba 7 densema lir.

India nung Khristantem anema inyakba tatalokbatem shilem 76.9 bo state 5 kija nung liasü. tesüiba küm ter tsüingda Uttar Pradesh nung Khristantem anema inyakba tatalokba 1,317 liasü, Chhattisgarh nung tatalokba 926, Tamil Nadu nung 322, Karnataka nung 321 aser Madhya Pradesh nunga Khristantem anema inyakba tatalokba 319 liasü.

Takoksa angurtem rongnung Dalit nunger Khristan 22, Khristan tetsür 16 aser tribal Khristan 15 densema liasü, ta

parnoki metetdaksü.

Institute for Economics & Peace-i ashiba agi, India nung yimsü dak sendakba rara balala ajanga küm shia sen trillion 1.19 takoksa angur, aser ibaji GDP shilem 9 lir.

November 29 nü ayongzüka senden omenji "Towards a Self Reliant, Progressive and United India" asütsü aser iba senden nungji sorkar aser opposition naprongla nungi MP tem, union aser state sorkar minister tem, Arogo nung tekolakpurtem, lokti tentet balala nungi lenirtem aser yimsü balala nungi lenirtem adentsü.

Iba senden nungji Andhra Pradesh, Chhattisgarh, Goa, Gujarat, Haryana, Jharkhand, Karnataka, Kerala, Madhya Pradesh, Maharashtra, Odisha, Punjab, Rajasthan, Tamil Nadu, Telangana, Uttar Pradesh, West Bengal, Chandigarh aser Delhi NCR nungi lenirtem adentsü. Senden nungji All India Catholic Union, National Council for Dalit Christians aser Hindu, Buddhist, Jain, Sikh, Islamic, Brahma Kumari aser Parsi lenirtema adentsü.

Iba senden nungji tongtibang tebilemtsü onük asem jembitsü-nija aser reju balala anema inyakba, SC nungi Dalit nunger Khristantem züingdokba aser tribal nüburtem temeden balala anema inyakba onüktem jembitsü.

October 17, 2025 nü Supreme Court-i, Uttar Pradesh nung anti conversion ozüing ya tai maket sensotem amokmerentsü atema hadir ama amshir, ta metetdakja liasü.

United Christian Forum Tir, Michael Williams-i, iba sendenji tongshi pezü nung ajemdaker agitsü- itemji tebilemtsü onük, tenangzüka, jenjang aser lenmang lir, ta ashi.

Michael-isa, "Iba ya yimtenren indang mapatong ka masü saka Khristan yimsü amanger India sensotem tsüingda linük temzüing dak sendakba jembitsü aser Khristantemi democratic temeden balala amshitsü atema lir," ta metetdaksü.

"India nung Khristan nütsüing million 28 shi dang lir aser ibaji India nunger nütsüing shilem 2.3 shi dang lir. Ajisüaka Khristantemi shisaliok reju 50,000 dak tema aser healthcare

facilities 5,000 dak tema lapoka senso ajak tenzüker, ta sangdong nung shia lir.

Senden ayongzükertemi sorkar dang, tangsa Dalit Khristan million 8-10 nem Scheduled Caste jenjang agüjang, tribal Khristantem nem ST jenjang agüja aliba magientsüla, Khristantem anema inyakba tatalokba ajak asoshi FIR benoktsüla, yimsü dak sendakba ken otem tekeraba nung latettsü atema fast-track courts amenoktsüla aser state-level monitoring committee tenteta ita asem shia National Commission for Minorities nem report agütsütsüla, ta takhangba agütsü.

Osangbenertem senden tembangba sülen "The Delhi Declaration 2025" renem aser ibaji India Tir, Ato kilonser, Union Home Minister, Union Minister for Minority Affairs aser Chief Justice of India nem agütsütsü.

Ato kilonser Modi-i Syro-Malabar Arogo nung lenirtem ajuru



Mongolbarnü (November 4) New Delhi nung Ato kilonser Narendra Modi-i Syro-Malabar Church nung lenirtem den senden amenba sülen tangokba noksa nung angur.

November 06, 2025: Mongolbarnü (November 4) New Delhi nung Ato kilonser Narendra Modi-i Syro-Malabar Church nung tongti lenirtem ajurua senden ka amen.

Syro-Malabar Church nung tekolak, Major Archbishop Mar Raphael Thattil aser Faridabad Archdiocese nung Archbishop Dr Kuriakose Bharanikulangara na leniba nung Arogo nungi tongti putirtemi Ato kilonser ajuru.

Senden tembangba sülen Ato kilonser Modi-i X ajanga, "Syro-Malabar Church nung tongti, Major Archbishop Rev. Mar Raphael Thattil,

ANOGO ABEN TSÜNGREM DEN

Shibai Parnok Idakji Yutsü ?
T.Ken 75:1-10

Kodang nüburtemi peisasa temaba atur aser mezüingbuba asütsü meranger, tekong 7 ji azüingtsü junger: "Saka Tsüngremji o bendanger. Pai ka ludaktsür, ka tudaktsür." Iba yagi asenok asükümba arütsür. Nüburtem kechi jenjang nung lir parnok idakji alitsü shibai mela? Tsüngremi Yohan Baptitsübai ashi, "Kotak nungi nisung nem kechi agütsür iba dak alema, pai kecha angutsü makok" (Yn. 3:27). Peteri zülü, "Anungji mapang tetemsü nung nenok uludaktsütsü asoshi, nenoki nenok sasa tashi taitba teka kübok ajemalua kümang" (1Peter 5:6). Shibai tanishirtemi temaba jenjang nung ulutsür? Tsüngremi. Shibai temeba menden nungi teküpbokbai uludaktsür? Tsüngremi. Ibai inyaktsü shiba shisa aka? Tsüngrem. Pa kechi jenjang nung lir aji Tsüngremi pa idakji nüngdaker ta shingai mebilemtsüla.

Asenok kong lir idakji lir, kechiaser Tsüngremi asenok idakji yutsü ta asenoki angatetdi. Tekong 7 jagi asenok asükümba dang arutsür masü- iba yagi aremzüksü ajungshir. Yosef taküm bilemdangang, pa tsükchirtem ludaktsütsü aser pa kechi nung alitsü tim ataa ali. Mosa aser Nehemiah indang bilemdangang. Asenok tarezmük koda nüngdak! Ken ken Tsüngremi pa nübur taochi makaba yimsüsür kübok yutsür. Asenoki mulungba raksatsü asoshi Tejen Lai nung ama, Tsüngremi mapang tamajung ajanga odaktsür aser asenok tali pa mesüka kümdaktsür.

Tasembuba, iba yagi asenok taküm nung shisa bulu pungpadaktsür. Na tanishir menden nung lir asü? Tsüngremi na idakji yutsü. Tsüngremi na idakji yutsü nungji Pai mulungba tashi na idakji alitsü. Pai shimtetba leman nung Tsüngremi na amshitsü. Asüküm masütsü kümdangang. Kodang asenoki asükümdir aser mezümekümdir, Tsüngremi ashir, "Ibai na alutsü mapang lir." Saka asenoki asen tila kümra, Tsüngremi ulutsütsü. Pa tekai asenok ajungkettsü. "Tsüngremi asükümer nokdanger, saka ajemalur nem taochi agütsür" (1 Peter 5:5).

Tanishir tajung kübok na mapa inyakdak mesüra arogo nung timtema alir asü? Tangari telemtetba tamajung agiba agi parnok idakji yutsü asü? Ne khuret ajak Tsüngrem dangi bener arung aser itemji lemsatepang. Maneni aotsü Pa dang tashi asüingdangang aser Pai obendangtsü ta bilemtettang.

semdangtsü atema Pope jaokdaksüner, ta temepishiba ka agütsü.

Iba senden nungji Kerala BJP Tir aser taoba mapang Union Minister Rajeev Chandrasekhar aser party lenir Shone George nata liasü.

Chandrasekhar-i, "Onoki yimsü nung ajemdaker meinyaker. Ozü party-i nübur ajak tenzüker. BJP ya nübur tenzüka party ka liasü aser maneni yamaji alitsü," ta ashi.

Senden nungji Ato kilonseri, India nung Arogoi shisaliok, healthcare aser loktiliba tenzüka mapa balala inyakba atema pelaba lematep.

Arogo nung lenirtemia maneni shisaliok, loktiliba aser Arogoi inyakba wadang balala nung amalitepa inyaktsü imlar, ta ashi.

Syro-Malabar Church ya alima nung Khristan Arogo tejentibatem rongnung ka lir. Kerala nung Catholic Church rites asem- Syro-Malabar rite, Syro-Malankara rite aser Latin rite lir, aser item ya akhidang France aser Portuguese nungeri tenzüksüba lir.

Yisu nütsüing Toma-i 42 nungi 72 AD tsüingda India nung Khrista osangtajung proka liasü.

AO OSHI ANGAZÜKDAK:**TANÜ ANGAZÜKTSÜBA OJANG****Tongro**

(n) nokinketeri anoba yongmen yin naro (warrior's earring made of brass)

* Tongro anoba agi nokinketer ayak meteter.

Tongror

(n) yimten nung ketdangser rogo (decision making body)

* Tongror rongnung tain shisataka nisung alitsüla.



Tir Yimyim

OLONG PAITEP # 7322

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

1. Nisung jenti
4. Tsük rudenba
6. Temzüng tesashi
8. S_ _ _ i
9. Nisung rongnung telemsa
10. Anogoshi
12. Ajanga aor
13. Tsük rizüngdak
14. Tebang nungi adokba
16. Süngdong tatembangtiba
17. Meputep

-

(5)

-

(5)

-

(5)

-

(3)

-

(3)

-

(4)

-

(4)

-

(3)

-

(3)

-

(5)

-

(5)

LANGTSÜNGLEN

1. Tenük telong
2. Committee dang ajar
3. Yagi ki okdoker
5. Yim lenmang
7. Temoatsü keter meyipa aruba
11. Kanga junga menemba
12. Kenyongi majinü
13. Rong kanga tulu

-

(9)

-

(5)

-

(7)

-

(5)

-

(9)

-

(7)

-

(5)

-

(5)

-

(5)

OLONG PAITEP # 7321 TELANGZÜBA**TIPIEN :**

1. Tanga, 6. Wara, 7. Rajang,
9. Anük, 10. Jenjang, 11. Alar,
14. Ngashi, 15. Nala, 16. Mechi.

LANGTSÜNGLEN :

2. Anga, 3. Yabang, 4. Tarok,
5. Orak, 8. Ainer, 9. Anema,
10. Jabili, 11. Among, 12. Miim,
13. Anem.

NAI-A YA METETTER

Nüngtugu kentenba telok BLUE pur küm 25 ajungba nüngdem nung linük balala nung kentenba sentong ayongzüka agiba nung shilem ka ama taküm December 11 nü Shillong nung Polo 2nd Ground nung shilem agitsü.

Union Minister-i IDP indang ken o asadang**Imphal, Yimpoksüi/ November 6 (Agencies):**

Union Minister of State for Home Affairs, Bandi Sanjay Kumar-i Bodhbarnü video conference ka ajanga Churachandpur District Administration inyakyim aser talisa Internally Displaced Persons (IDPs) dak sendakba nung parnok inyakyim asadangogo. Iba senden ya Hotel Classic Grande, Imphal nung mena liasü.

Churachandpur District Administration inyakyim aser talisa Internally Displaced Persons (IDPs) dak sendakba nung parnok inyakyim asadangogo. Iba senden ya Hotel Classic Grande, Imphal nung mena liasü. Churachandpur District nung relief camp 75 nung IDPs 15,000 shi lir.

Minister-i, lenla ajak nung district terenlok asadang aser talisa relief camp tem nung IDP tem libaliro jenjang aser centre o state scheme tem koda benoka inyaker item ajak asadanga liasü.

Pai, health, education, power, agriculture, transport, handloom, aser handicrafts amala tongtibatang sector tem inyakyim asadang aser sorkar service

tem dak sendakba nung nüburtem tebilemba aser tashishibatem indang asüngdanga liasü.

Churachandpur Deputy Commissioner, Dharun Kumar S-i, district nung tang benoka inyaka aliba project aser sentongtem indang Minister nem metetdaksü.

IDP tem nem parnoki nüngdakba facility tem agütsüdar aser parnok rehabilitation aser libaliro jenjang tajungba kümdaktsütsü atema nongita yaridar, ta ketdangsürtemi metetdaksü.

Shisaluyim indang jembiba mapang Deputy Commissioner-i ashiba agi, PM SHRI School tem, state sorkar institution, Jawahar Navodaya Vidyalaya aser Kendriya Vidyalaya amala central institution tem aser nija school tem ajanga higher secondary education nung district-i kanga junga shilem agidar.

Administration-i jenjang

tapet agiba ajanga kümtem tsüngda school züngtur anenertem tajemba kümogo. Ajisüaka pai ashiba agi, higher education institution tem nung azüngtsü atema kaketshirtem asoshi maneni tetsükdaktsü adoker aser PR scheme kübok inyakyimtem ajanga tawa aliba ya süngdaktsütsü merangdar.

Health sector indang jembiba mapang Dharun Kumar-i ashiba agi, Churachandpur district nung medical college ka lir aser iba ya healthcare dak sendakba nung district ajak rongnung tajungtiba inyaksangshiba district ka lir.

Centre-i maneni teyari agütsütsü nangzüka Bandi-i, district administration dang aluyimba aser horticulture aser animal husbandry amala allied inyakyimtem nung temulung agütsütsü mepeshia liasü.

Union Minister yagi anogo asem atema Manipur semdang aser Bodhbarnü Imphal toktsür linük yimtibai oa liasü.

Mizoram piped gas project takok ngua benoka inyakdar

Guwahati, Yimpoksüi/ November 6 (Agencies): Tripura nungi Mizoram tashi gas pipeline amenoktsü atema project ka tanem tanemi benoka inyakdar, ta ketdangsürtemi metetdaksü.

Iba project ya tembanga inyakba sülen iba pipeline yagi Mizoram aser talisa state yimtiba Aizawl yimti nung kibong shia nem piped gas connection agütsütsü.

Mongolbarnü Food, Civil

Supplies, and Consumer Affairs Minister B. Lalchhanzova-i anir iba project lepa repringshiba senden ka menogo. Iba inyakyim ya North East Gas Grid (NEGG) program kübok benoka inyakdar.

Iba pipeline ya Tripura kübok Parisagar tesem nungi Aizawl anasa Sihhmui tashi km 119 mesangtsü. Pipeline ya ya km 104 Mizoram nung aser tanunga ya Tripura nung

mesangtsü. Ketdangsürtemi ashiba agi, pipe ya km 28 nungbo rematokogo, koba iba project shilem 23.5 asütsü.

Mizoram sorkar aser Indradhanush Gas Grid Limited na senteper iba project ya benoka inyakdar. Parnoki tanungba pipe ta takaratiba nung remyonga ao mapang shitak nung renemtsü asoshi tasa balala asar maneni inyakyonga odar.

Tinsukia nung nisung shibelener trok apu

Dibrugarh, Yimpoksüi/ November 6 (Agencies): Assam anüdoklen Tinsukia district nung nisung shibelenba dak sendakba nung police-i nisung trok puogo.

Aija alirtem ya Dipak Phukan, Umakanta Chetri, Boby Deori Sona, Rohit Khadal, Peter Sabashi, aser Ajit Munda ta jangaago.

source balala ajanga ashiba agi, Dipak Phukan ya Pengeri police station kübok Duarmara Singpo yimtsüing nungi yimdaklirtemi apu. Pa ya iba yimtsüing anasa aliba süngolu ka

nungi tanur ana pur aotsü atema aruba sülen apu.

Iba sülen yimdaklirtemi Dipak Phukan ya Pengeri police nem bendanga agütsü. Pa apuba sülen police ano ken o dak sendakba nung Umakanta Chetri, Boby Deori Sona, Rohit Khadal, Peter Sabashi, aser Ajit Munda nung pua liasü.

Iba dak sendakba nung Pengeri police station nung ken o ka (case, number 28/2025, U/ S 143(5)/3(5) BNS) benokogo.

Ken o nung aija alirtem rongnung tongtiba Peter Sona tang tashi monguteti lir.

Kasa mapang nung police-i pa aputsü atema bushisüngdang tenzüko.

Source temi ashiba agi, nisung shibelenertemi upper Assam nung süngolutem nungi tanurtem pur aotsü atema rangloker inyakdar.

"Nisung shibelener aoba ken o ya timba Tinsukia kübok Doomdooa tesem nung ataloker. Iba inyakyim ya süngolutem nung kanga bulua atalokdar aser shibelenertemi süngolu nung inyaktertem dak rangloker inyakdar," ta sourca kati ashi.

ANÜOLEN AOLI LONGCHAR KIDONG TELONGJEM

H.Q. DIMAPUR-797112, NAGALAND
(2000-2025)


Silver Jubilee Sentong



Omen : *Arok Jangyumedem.*

Anogo: 11th Nov. 2025 Mapang : 10:00 AM Tesentepdak : Senden Riju, ISBT, Purana Bazar

Tongti O Jembir : **Wb. M. Temjen Longchar**
Jt. Director (Rtd), RD,
Govt. of Nagaland



Jubilee lapokba : **Wb. Moyatoshi Longchar & Dr. Resenmenla Longchar**

1. Sentong lenir : Ketdangpur, AALKT.
2. Telok Ken : Anisüngzük Tepela anogo
3. Sarasademtsü : **Rev .Yanger Longchar**
Pastor, Indisen Baptist Arogo
4. Jubilee Munger agizükba : **Wb.A. Temjenchiba Longchar**
Tir, AALKT
5. Tayongzükba O : a) **Wb.L. Daniel Longchar, IAS**
Secretary (Rtd) & Kimen, AALKT
6. Ni ya Shiner : **Wb. Lolenmayang Longchar**
7. Sobaliba Ken ka : Sanen Luden & Jubilee Planning Luden, AALKT
8. Onük : **"Arok Jangyumedem"**
9. Ken ka : Süngratsü Bajalartern
10. Tepela Salem O : i) **Dr. Imkongwapang Longchar,**
Tir, Aoli Longchar Mungdang, Mkg
ii) **Wb.T. Maong Longchar,**
First President, DALKT
iii) **Wb. Süngjemkaba Imchen,**
Tir, DAMKT
iv) **Dr. Ngangshi K. Ao,**
Former Minister
11. AALKT asoshi sarasademtsü : **Rev. Dr. Moa Imsong,**
Counselor, DABA
12. Jubilee kaket saya : **Wb. Benjontoshi Longchar,**
Convenor, Editorial Board.
13. Jubilee Planning Osang : **Wb. Taliwati Longchar,**
Convenor, Jubilee Planning Luden.
14. Melepzüng O : **Wb. Imotemjen Longchar,**
Tongti zulur, AALKT.
15. Tatem Sarasadem : Telok.

"Jubilee Chiyong"

TEMETETTSÜ O :

1. Anüolen Aoli Longchar Kidong Telongjem Mendenti ajanga asen Longchar aser Anük-apang, tetsü-tamo tila tulu na iba benjong Mung Sentong nung longsotepa arua atentsü pelashishia jaoker.
2. Timsür (volunteers) Changki Longchar kidong nem in-charge agütsür
3. Tepela /Tayongzükba / o Jembir Shia 7 minutes aser onük Jembiri 25 minutes tashi agütsü mepishir.
4. Ajaki sobaliba ayak nung sobur arutsü ayongzüker
5. Jubilee mong sentong takok angutsü asoshi ajaki sarasadema atadi.

US-i nuclear tendangba mapa tenzükshira Russia-i tapet mera agütsü: Putin

Moscow, Yimpoksüi/Nov. 06 (Agencies): United States nung nuclear tendangba maparen küm aika anena atar Tir Donald Trump-i iba mapa tenzükshitsü totuyuba agütsüba sülen Russia Tir Vladimir Putin-ia Kremlin ketdangsürtem dang nuclear nok-nü tendangba maparen tenzükshitsü asoshi draft proposals renemtsü shiogo. Bodhbarnü Russia leniri par Security Council dang US mesüra Comprehensive Nuclear-Test-Ban Treaty (CTBT) nung meyongnem agüja alir kari danga nuclear

nok-nü tendangra, Russia-ia tapet mera agütsüsa akumtsü ta ashi.

"Iba atema ni Foreign Ministry, Defence Ministry, special services aser corresponding civilian agencies dang iba indang osang tali bendentsü asoshi akokba mapa ajak inyaktsü, Security Council ajanga kanga junga asadangtsü aser nuclear nok-nü tendangtsü atema renemshiba nung mezüing mera agütsü rangloker proposals agütsütsü tuyur," ta Putin-i ashi.

1991 küm Soviet Union laoba sülen Moscow-i nuclear

nok-nü tendanga mali. Ajisüaka Russia-i Ukraine nung rara manenba mechi Trump-i Putin dang tezü atangba tali akumba ajanga alima nung nuclear nok-nü timtiba yua aliba linük ana tsüngta tensa tamajungba akumer.

US leniri October ita Hungary nung Putin den senden amentsü sentong athi aser anogo ka lir Russian oil firms tulu ana nem tenokdangba agütsü, koba January ita Trump ya US tir akumba sülen iba ama mera mezüingbuba alütsü.

Iba sülen October 30 nü Trump-i Department of Defense dang nuclear nok-nü bena aliba danga linüktem den kasa jenjang nung tekeratiba nung nuclear nok-nü tendangba tenzükshitsü totuyuba agütsüogo ta ashi.

Moscow-i Burevestnik missile tasen tendangba Trump-i aitsür anogo ishika lir iba telemtetba ya agia liasü. Burevestnik missile ya nuclear-powered lira ser nuclear warhead abentsüsa yanglua lir. **(Maneni tapak 8 nung...)**

Philippines nung nisung 114 takum samatsüba yipru Vietnam leni aor

Hanoi, Yimpoksüi/Nov. 06 (Agencies): Typhoon Kalmaegi, koba ajanga Philippines nung nisung 114 takum samatsü, iba yipru nung mopung tesashiba kumer central Vietnam leni arutar.

Tzükum nung aliba nisung meyirijang aika dang iba yipru arua matongdang ainshitsü shiogo, koba ajanga tzüsem ya feet 26 tashi adokdaksütsü imlar, ta Vietnam indang tzüngsang-mopung takzür ajanga ashi.

Kalmaegi ya taküm typhoons tesashitiba rongnung ka lir, koba ajanga taoba hopta ang tzünglu kanga sashia arua tzümetsüing tesashi agi teraksa yutsür nüburtem timtema aliba nung ano lendong timtem tali agütsütsü amai ajiteter.

Tayimtsü 50 dak tema thiogo mesüra mapang melenshiogo aser region nung airports trok nung operations anena lir.

Vietnam indang Deputy Prime Minister Tran Hong Ha-i Kalmaegi ya kangadang shidak masüba yipru ka lir ta ashi aser ketdangsürtem dang süoki ia agütsü ajungshia liasü.

Iba yipru ajanga Philippines nung nisung aika takum samaja teraksatsüba jenti yutsür aoba sülen Brehostibarnep Philippines Tir Ferdinand Marcos Jr-i state of calamity sangdongogo. **(Maneni tapak 8 nung...)**

MAMATETER

Temeim ojala Mrs. Shilukokla Imsong (Longkong), nai pongmang ka ama aoksa onok toktsür asüyimi orr tanü 7th November, 2025 anogo küm 10 (ter) renteta iba akümüli nung onok mulungjang kanga rongjenseta lir. Iba akümüli wadang nung kodanga amatsü makokbaji na lir. Na tanü onok den meliaka ne tesüngjem taremsük, ajemalu jakla aser onok asoshi bendanga agütsüba temeim mapatem onok mulungjang nungi kodanga pilatsü makok. Iba akümüli nung alidang onok asoshi ajak dang tajungtilaji na liasü.

Temeim oja, na onok den meliaka ne tenüngji sentilong dang nungia taoba onok mulungjang nung teti alütsü.

Temeim Kinungbo, Chirnurtem, Semchirtem aser Kinungertem.



AFFIDAVIT

Regd No. 6197 Date: 14/10/25
(Correction of Name)
I, Smti. TEMSÜNUNGLA AKINARO LONGCHAR, D/o. A MOALIBA LONGCHAR current address: Officers Hill Kohima, Nagaland do hereby solemnly affirm and declare an oath as follows:
1. That I am the bonafide citizen of India.
2. That that in some of the documents my name has been recorded as TEMSÜNUNGLA AKINARO LONGCHAR and in some of the documents my name has been recorded as TEMSÜNUNGLA LONGCHAR hence, the stated name represents the same person i.e., myself.
3. That henceforth, I herewith rectify the same and declare that my name will be TEMSÜNUNGLA AKINARO LONGCHAR and the same will be used for all official purposes.
4. That the above statements made in para 1-3 are true to the best of my knowledge and no material concealed herein and I signed this affidavit before the competent authority on 14th Oct. 2025 at Kohima.

DEPONENT

Solemnly sworn before me by the deponent above mentioned name on 14th Oct 2025 at Kohima.

NOTARY PUBLIC

AFFIDAVIT

Regd No. 6198 Date: 14/10/25
(Correction of Name)
I, Shri. LONGCHATSÜNG SAMUEL LONGCHAR, S/o. A MOALIBA LONGCHAR Current Address: Officers Hill Kohima, Nagaland do hereby solemnly affirm and declare an oath as follows:
1. That I am the bonafide citizen of India.
2. That that in some of the documents my name has been recorded as LONGCHATSÜNG SAMUEL LONGCHAR and in some of the documents my name has been recorded as LONGCHATSÜNG LONGCHAR hence, the stated name represents the same person i.e., myself.
3. That henceforth, I herewith rectify the same and declare that my name will be LONGCHATSÜNG SAMUEL LONGCHAR and the same will be used for all official purposes.
4. That the above statements made in para 1-3 are true to the best of my knowledge and no material concealed herein and I signed this affidavit before the competent authority on 14th Oct. 2025 at Kohima.

DEPONENT

Solemnly sworn before me by the deponent above mentioned name on 14th Oct 2025 at Kohima.

NOTARY PUBLIC

Dimapur SC-i Capt Kenguruse Football Tournament kokogo



Kohima, Yimpoksüi/ November 6 (TYO): Brehostibarnü Indira Gandhi Stadium, Kohima nung 9buba Capt Kenguruse Football Tournament final nung Dimapur Sporting Club-i goal 2-1 agi defending champions Headhunters FC kokogo.

Dimapur SC-i asaya kanga tashi ita tenzük aser parnok rongnungi Nangshang-i minute 3buba nung mezüngbuba goal idakja liasü. Iba sülen ano minute 11buba nung Rhitsho-i Dimapur SC atema tanabuba goal idakja parnok tejakdang sür asaya mezüngbuba shilem

tembanga liasü.

Asaya tanabuba shilem nung Headhunters FC-i asendenshi tajungba asaya tenzük aser parnok rongnungi Haotingmang-i minute 55buba nung goal ka idakja timla agütsü. Asaya tatem Headhunters pur goal idaktsütsü atema takok tashi nongshia asaya saka Dimapur SC-i kanga junga defend süteta parnok asaya akok.

Kasa mapang nung tasembuba jenjang atema asayaba mapang Langsa Hill FC (Mon)-i goal 7-0 agi Lüshe FC (Phek) koka liasü.

Asayamung akokba team

nem senpet sen lakh 3 den takok marok aser kuli kakat agütsü aser runners-up nem sen lakh 1.5 agütsü. Maneni tasembuba aser pezübuba jenjang nung tembanga team nem senpet sen 75,000 aser 50,000 agütsüogo.

Tanga jurila sempet angurtem:

- * Golden boot- Laiwang Bohham Headhunters FC
- * Best midfielder- Hivika Zhimo Langsa Hill FC
- * Best Goalkeeper- Neithovilie Chalieu Dimapur SC
- * Player of the tournament - Katoho Dimapur SC.

MH-10-i 'All Nagaland Volleyball Championship 2025' benogo

Mokokchung, Yimpoksüi/ November 6 (TYO): Aliba yimdak L.L Group-i ayongba aser NAKZOER teloki achayangba 'All Nagaland Volleyball Championship 2025' final nung MH-10-i Changtongya Volleyball Association (CVA) koka iba asayamung benogo.

Iba asayamung shibangba sentong nung MLA & Advisor for IPR and Soil & Water Conservation, Govt. of Nagaland, Imkong L. Imchen

tetushi tesemdang liasü.

Final match MH-10, Kohima o Changtongya Volleyball Association (CVA) na asayaba, MH-10-i points 19/25, 25/22, 27/25 aser 25/18 agi CVA madak takok tulu ngua taküm iba asayamung marok parnok benogo.

Takoker mezüng, tanabuba, tasembuba aser pezübuba angur nem senpet sen 1,20,000/-, 80,000/-, 60,000/- & 40,000/- agütsü.

Nija senpet agizükertem:

- * Best Spiker - Imlichuba (MH-10).
- * Best Setter - Limatenzük (CVA).
- * Player of the Tournament - Reshitemjen (MH-10).
- * Emerging player of the Tournament - Moasunep (Town Club, Mangkolemba).
- * 3rd place: Town Club, Mangkolemba (parnok 22/25, 25/21 & 15/9 agi Blind Spikers LL Group pur akok).
- * 4th place: Blind Spikers.

Champions League: City aser Inter Milan nati pei tata asaya akok

Yimpoksüi/November 6, 2025 (Agencies): Bodhbarnü Champions League nung Manchester City-i goal 4-1 agi Borussia Dortmund madak takok ngua parnok taküm iba asayamung nung khi danga tamakok mongui asaya arudar. Kasa mapang nung Inter Milan-ia asaya kokogo, saka Barcelona bo Club Brugge den draw asü.

Etihad nung asaya nung City atema Phil Foden-i goal ana idaktsü aser Erling Haaland-ia goal ka idakja iba asayamung nung goal pongububa idaktsüogo. Dortmund atema Waldemar Anton-i goal ka idaktsü, saka Rayan Cherki-i mapang apuloktsür asayaba mapang City atema goal pezübuba idakja parnok asaya ayong ayonga akok.

Pep Guardiola-i aniba team

yagi asaya pezü nung point 10 ngua parnok table nung pezübuba nung lir.

Tanga asaya ka nung Inter Milan-ia Kazakh team Kairat Almaty koka asaya pezübuba atonga kokogo aser parnok Bayern Munich aser Arsenal na den temaba jenjang nung lir. Asaya nung Lautaro Martinez-i goal ka idaktsür aliba asaya tanabuba shilem tenzük minute 9buba nung Ofri Arad-i küptok, saka Carlos Augusto-i ano goal ka idaktsüba sülen Inter-i asaya akok aser parnok round of 16 atema indang indanga qualify asütsü atema jenjang junga kümogo.

Kasa mapang nung Barcelona pur Belgium club Brugge den goal 3-3 agütsür kasa nung asaya tembanga liasü. Asaya nung Brugge atema Carlos Forbs-i goal ana

idaktsüba den Nicolo Tresoldi atema ball ka assist sütsü, saka Barca atema Ferran Torres, Lamine Yamal nati goal kaka idaktsüba den Christos Tzolis-i own goal ka idaktsüba sülen asaya kasasa nung tembanga liasü.

Maneni Chelsea pura Alejandro Garnacho-i equaliser ka idaktsüba ajanga Qarabag den goal 2-2 agütsür draw süogo. Asaya nung Estevao Willian-i Chelsea atema mezüngbuba goal idaktsü, saka Leandro Andrade-i Qarabag atema goal ka idakja kasasa aküm aser ano Marko Jankovic-i goal ka idakja parnok tejakdang aküm. Asaya tanabuba shilem nung Garnacho-i Chelsea atema tanabuba goal idaktsüba ajanga parnok takoksa ajangshitsü aliba nungi jenbogo.

BENDANGLI OSANG : Tapak 7 nungi...

US-i nuclear tendangba mapa...

Defence Minister Andrei Belousov-i Putin dang Washington indang tesüsa inyakyim yagi Russia nem mitkar tsütsü timtem bener arutsütsü jenjang kanga sashia tuluba kumogo aser nisung meimchir temi magizükettsüsa teraksa peria agütsütsü asoshi asen nuclear tashi renema alitsü nungdaker ta ashi.

Russian Armed Forces nung Chief of the General Staff, Valery Gerasimov-ia, Russia-i tang tapet mera magira, United States inyaksangshi nung mapang shidak nung telangzüba agütsütsü mapang aser maongka samatsü ta ashi.

Iba senden tembanga sülen, Putin-i iba proposal yanglutsü asoshi mapang telatet tejangja magütsü, ta

Kremlin odongtar Dmitry Peskov-i ashi.

Alima nung nuclear tashi ya Russia aser US kanga agi tulutiba lir.

Moscow ket nung tang nuclear warheads 5,459 lir aser iba nungi 1,600 tesem balala nung renemer yua lir ta Center for Arms Control and Non-Proliferation (CACNP) ajanga asadangteta lir.

US ket nung nuclear warhead 5,550 shi lir, aser item nungi 3,800 shi 'active' lir ta CACNP-i ashir. 1960s tiyonglen Cold War mapang US ket nung 'active' aser 'inactive nuclear warheads' 31,000 shi liasü.

China, France, Britain, India, Pakistan, Israel aser North Korea linüktem nunga nuclear nok-nü lir.

Philippines nung nisung 114 takum...

Iba yipru ya ajanga Cebu nung jila tem ajunga nung tzümetsüng adokdaksü, kong nisung 71 asüba osang lir. Ano nisung 127 samar bushir aser 82 yiru ta ketdangsür temi ashir.

Cebu provincial ketdangsür temi ano nisung 28 asüba osang agütsüogo aser item ya national civil defence office ajanga sangdongba nung maden ta ashir.

Typhoon Kalmaegi ajanga raksatsüba aser ano hopta tatemlen Uwan yipru arutsü teimla nung iba telemtetba ya agi, ta Tir Marcos Jr-i osangbener dang Brehostibarnü ashi.

Nisung 2.5 million aliba Cebu nung iba yipru ajanga

nisung 400,000 dak tema pei ki yutsür tesem balala nung prokshia lir ta national disaster agency ajanga ashi.

Asürtem rongnung ya nüburtem den yariteptsü yokba military helicopter ka Mongulbarnü Cebu south tsütsü Mindanao asetkong nung tsükoka yangji alir nisung trok asüba dena lir.

Typhoon Kalmaegi dang Tino ta ajar, aser ibai taküm Philippines nung kongshiba tropical cyclone 20 buba alitsü.

Typhoon Kalmaegi ajanga Thailand nunga ajungben tzümetsüng, alinen aser ayongtem nung tzü tali ayimtsü ta ketdangsür temi tekumandangtsü shia lir.



New Delhi, November 06, 2025: Brihostibarnü Rashtrapati Bhavan nung Tir, Droupadi Murmu-i tetsür cricket team captain, Harmanpreet Kaur ajurudang tangokba noksa nung angur. Tawa ODI World Cup nung Indian team-i takok ngua liasü.

BILEMDANGANG

"Tangar sempet nükshia kazü dang pei sempet tesamadaktsü."